



Ulloq: 1. februar 2024
Allaffik: Nordatlantkontoret
Sul.sulia: Simon Holmelund Lange
Suliap normua.: 2023-06736
Takussutissiaq.: 3061556

E Q I K K A A N E Q

**Kalaallit Nunaanni eqqartuussisarnermik inatsisip
allangortinneqarnera pillugu inatsit
(Inuit sakkutuujunngitsut pillugit eqqartuussivimmi suliat Nunatta
Eqqartuussisuuneqarfianut innersuuneqarnerat)**

Danmarkimi atuuttut inuit sakkutuujunngitsut pillugit eqqartuussivimmi suliasat pingaarluinnartut pissuseqartut inuiaqatigiinnut tunngasumik pingaarutilimmik kinguneqartussat nalinginnaasumik pingaassuseqartut siunissami eqqartuussisuuneqarfimmi suliarinneqqaarfiusutut innersuuneqarsinnaanerat pillugu Kalaallit Nunaanni periarfissap assingata ilanngunneqarnissaa, siunnersuummi siunertarineqarpoq.

Suliaq pingaarluinnartut pissuseqarpat aamma inatsisinik atuinermut aamma eqqartuussisutigoortitsinermut suliasaqarfimmi ineriartornermut imaluunniit allakkut inuiaqatigiinnut tunngasumik pingaarutilimmik kinguneqartussat nalinginnaasumik pingaassuseqarpat, akuusup noqqaassuteqarneratigut, inuit sakkutuujunngitsut pillugit suliap Nunatta Eqqartuussisuuneqarfiani suliarinneqqaarfiusutut suliarineqarnissaanut innersuussinissaq pillugu Kalaallit Nunaanni eqqartuussisarnermik inatsimmi malittarisassamik ilanngussisoqarnissaa siunnersuutigineqarpoq.

Suliat taamaattut, Nunatta Eqqartuussisuuneqarfiani eqqartuussisunit pingasunit suliarineqassasut siunnersuutigineqarpoq, taamaalilluni Nunatta Eqqartuussisuuneqarfia Nunatsinni Eqqartuussivimmut naammagittaalliuuteqartarfiutillugu, Danmarkimiit eqqartuussisuunernit marlunnit sulilersoqartassalluni.

Aaqqissuussinermi Danmarkimisut inuit sakkutuujungitsut pillugit eqqartuussivimmi suliassat nalinginnaasut ilaatinneqarnissaat, siunnersuutigineqarpoq. Aaqqissuussinermi ilaatigut ilaqtariit pillugit suliat ilaatinneqassanngillat.

Nunatta Eqqartuussisuuneqarfiata eqqartuussutaata, Ingerlatiteqqinnissamik aalajangiisartut akuersiteqqaarnagit, Eqqartuussiviit Qullersaanut naammagittaalliuutigineqarsinnaanera pillugu, nutaatut suliassanngortoqartarnissaa siunnersuutip kinguneraa, aamma taamaammat naammagittaalliuutit taamaattut qanoq ilillutik aallartinneqartarnissaat pillugu isummertoqarnissaa pisariaqarpoq, matumani naammagittaalliornissamut piffissaliussaq qanoq sivilisutigissanersoq ilanngullugu.

Pissutsit assigiinngissutaat malillugit Eqqartuussiviit Qullersaanut naammagittaalliuutip aallartinneqarnissaa qallunaat eqqartuussisarnermik inatsisaanni malittarisassat malillugit pissasoq siunnersuutigineqarpoq. Assersuutigalugu eqqartuussummik suliassanngortitsisup toqqaaneratigut eqqartuussisunut aggeqqusissut kalaallisut imaluunniit qallunaatut allanneqarsinnaasoq, tamatuma kinguneraa.

Ingerlatiteqqinnissamik aalajangiisartut akuersiteqqaarnagit, malittarisassatut siunnersuutigineqartut malillugit Nunatta Eqqartuussisuuneqarfianit eqqartuussut naammagittaalliuutigineqarpat, naammagittaalliuuteqarnissamut piffissaliussaq Danmarkimisut sapaatit akunnerinik 4-nik sivilisussuseqassasoq, siunnersuutip kinguneraa.

Inuit sakkutuujungitsut pillugit suliap Eqqartuussiviit Qullersaanni pingajussaaneersumik suliarinniffiusussatut naammagittaalliuutiginissaanut akuersissummik qinnuteqarnissamut piffissaliussap sapaatit akunnerinik 8-nik sivilisussusillip atuuttup, sapaatit akunnerinik 4-nik piffissaliinermut allanngortinneqarnissaa, tassunga atatillugu siunnersuutigineqarpoq. Ingerlatitseqqinnissamik aalajangiisartut akuersissuteqarsimatillugit, qallunaat piffissaliussaannut assingusumut atuuttumut, aamma siunnersuut malillugu naammagittaalliuuteqarnissap aallartinneqarnissaanut piffissaliussamut atuuttussamut, piffissaliussap naapertuuttunngortinneqarnissaa siunnersuummi siunertarineqarpoq. Suliap pingajussaaneersumik suliarineqarnissaata qinnutigineqarnissaanut piffissaliussaq 2010 sioqqullugu sapaatit akunnerinik 4-nik

sivissuseqarpoq aamma taamaallaat qallunaat piffissaliussaannut taamanikkut atuuttumut naleqqussarniarlugu sapaatit akunnerinut 8-nut allangortinneqarluni, tamannali kisianni 2014-imi piffissaliussamik sapaatit akunnerinik 4-nik sivissusilimmik allangortinneqarpoq.